

七支供養偈頌

所有十方世界中	三世一切人師子	我以清淨身語意	一切遍禮盡無餘
普賢行願威神力	普現一切如來前	一身復現刹塵身	一一遍禮刹塵佛
於一塵中塵數佛	各處菩薩衆會中	無盡法界塵亦然	深信諸佛皆充滿
各以一切音聲海	普出無盡妙言辭	盡於未來一切劫	讚佛甚深功德海
以諸最勝妙華鬘	伎樂塗香及傘蓋	如是最勝莊嚴具	我以供養諸如來
最勝衣服最勝香	末香燒香與燈燭	一一皆如妙高聚	我悉供養諸如來
我以廣大勝解心	深信一切三世佛	悉以普賢行願力	普遍供養諸如來
我昔所造諸惡業	皆由無始貪瞋癡	從身語意之所生	一切我今皆懺悔
十方一切諸衆生	二乘有學及無學	一切如來與菩薩	所有功德皆隨喜
十方所有世界燈	最初成就菩提者	我今一切皆勸請	轉於無上妙法輪

諸佛若欲示涅槃 我悉至誠而勸請
惟願久住刹塵劫 利樂一切諸衆生
所有禮讚供養福 請佛住世轉法輪
隨喜懺悔諸善根 迴向衆生及佛道